



2/24/2020 3:54 PM

## Posjeta Unsko-sanskom kantonu - Radončić sa premijerom Ružnićem i gradonačelnikom Fazlićem razgovarao o migrantskoj krizi



(/images/24022020.jpg)

Ministar sigurnosti Bosne i Hercegovine Fahrudin Radončić boravio je danas u posjeti Unsko-sanskom kantonu, gdje je imao odvojene sastanke s čelnim ljudima Vlade USK i Grada Bihaća, sa kojima je razgovarao o rješavanju problema migrantske krize koja je posebno pogodila ovaj dio BiH.

Premijer Unsko-sanskog kantona Mustafa Ružnić je u svom obraćanju istakao je da je zadovoljan rezultatima sastanka ocijenivši da ministar Radončić dobro razumije u kakvom stanju je Krajina i koliko je migrantska kriza pogodila ovaj dio BiH.

Dodao je da je dobio podršku ministra Radončića za sve poteze koje treba uraditi u USK kako bi dočekali novi migrantski val, od novih koraka koje će Ministarstvo poduzeti u ovoj godini, kroz zakonsku regulativu te kroz jačanje kadrovskog dijela i u Graničnoj policiji i u Službi za poslove sa strancima.

Radončić je istakao da BiH neće biti ruta slobodnog kretanja migranata, koji se žele domoći Evropske unije, te je naglasio da će migrantski centri "Bira" i "Sedra" u Bihaću i Cazinu biti ugašeni, čim se steknu uslovi za to. Dodao je da je kriza ilegalnih migranata do sada bila nepravедno raspoređena u cijeloj Bosni i Hercegovini te da su najveći teret su podnijeli Unsko-sanski kanton i sektor sigurnosti u BiH.

Također, naglasio je da Ministarstvo zaduženo za ljudska prava i izbjeglice mora preuzeti humanitarni aspekt krize.

"Legitimno pravo i ljudi iz Unsko-sanskog kantona i mene kao ministra jeste da poredamo prioritete. Prvi prioritet je Bosna i Hercegovina, drugi prioritet su sigurnost i komoditet građana BiH i ovog kantona, a tek treći prioritet su sigurnost i briga o migrantima. Ne možemo dozvoliti da zatrpamo BiH i od nje napravimo najveći parking za migrante koji ne žele biti ovdje, nego idu u druge evropske zemlje. Nemamo pravo da uništimo život ovog kantona, turizam, slobodu naših ljudi da se kreću", kazao je Radončić.

Ohrabrio je rukovodstvo ovog kantona da štite svoje građane i svoje ekonomske interese navodeći da su migranti počinili više od hiljadu krivičnih djela u USK.

Naglasio i da je tražio od predstavnika kantonalnih vlasti da kažu koliko ovaj kanton realno može primiti izbjeglica kako bi bili odgovoran partner i humani prema tim ljudima, a da to ne uništava život i komoditet građana ovog kantona. Dodao je i da BiH mora mijenjati i zakon o azilu, i mora prestati pritisak međunarodne zajednice da ova zemlja primi nerealan broj migranata.

Istakao je kako se sa EU i humanitarnim organizacijama mora razgovarati na drugačiji način te da se mora postići dogovor o podjeli krize unutar institucija BiH, odnosno na državnom, međukantonalnim i u međuentitetskim nivoima. Ocijenio je da ovo nije proces koji će trajati jedno ljeto, već više decenija. Zato smo svi, kao odgovorni ljudi, u obavezi da napravimo ozbiljne planove i strategije kako da budemo solidan partner međunarodnoj zajednici, ali kako da to ne pretvorimo u vlastito državno nacionalno i ekonomsko samoubistvo, poručio je Radončić.

Radončić se sastao s gradonačelnikom Bihaća **Šuhretom Fazlićem** sa kojim je također razgovarao o problemima migracija sa kojima se ovaj grad suočava posljednje tri godine.

Radončić je u tokom boravka u USK posjetio i terenski ured Službe za poslove sa strancima u Bihaću.